

Aatsitassarsiorfinni isumannaallisaaneq peqqissuserlu pillugit ILO-p isumaqatigiissutaanut nr. 176-imut Kalaallit Nunaata ilaatinneqarnissamik kissaateqarneranik Kalaallit Nunaanni Namminersorlutik Oqartussat nalunaaruteqarnissaat pillugu aalajangiiffigisassatut siunnersuut.
(Inuussutissarsiornermut Aatsitassanullu Naalakkersuisoq)

Saqqummiussaq

Siullermeenera

Aatsitassarsiorfinni isumannaallisaaneq peqqissuserlu pillugit ILO-p isumaqatigiissutaanut nr. 176-imut Kalaallit Nunaata ilaatinneqarnissaminik kissaateqarneranik Kalaallit Nunaanni Namminersorlutik Oqartussat nalunaaruteqarnissaat pillugu aalajangiussassatut siunnersuut Naalakkersuisut sinnerlugit saqqummiutissavara.

Danmarkip kisimiilluni isumaqatigiissummik atortussanngortitsinissaa attuumassuteqartussaangilaq, Danmarkimimi aatsitassarsiorfeqanngimmat. Tamanna tunuliaqutaralugu Kalaallit Nunaata isumaqatigiissummut ilaatinneqarusunnera pillugu sulisoqarnermut ministerip Kalaallit Nunaanni Namminersorlutik Oqartussat nalunaaruteqarnissaannik qinnuigai.

Isumaqatigiissummik atortussanngortitsinikkut, nunap atortussanngortitsisup aatsitassarsiorfinni isumannaallisaaneq peqqissuserlu pillugit anguniakkanik ataqatigiissunik piviusunngortitsissaaq, piffissallu ingerlanerani anguniakkanik iluarsartuusseqqittassalluni, taamaasiornikkut isumaqatigiissummi aalajangersakkat piviusunngortinnissaannut pingaarnerusumik siunertaralugu.

Isumaqatigiissummut atatillugu inassuteqaat suliarineqarpoq. Aatsitassarsiorfinni isumannaallisaaneq peqqissuserlu pillugit inassuteqaat nr. 183. Isumaqatigiissummi aalajangersakkanik inassuteqaat tapersiivoq, ilaatigullu aatsitassarsiorfimmi pitsaaliuineramik illersuinermillu iliuutsit pillugit aalajangersakkanik imaqarluni.

Kalaallit Nunaata isumaqatigiissummut ilaanissaa kajuminnartutut nalunaarutigalugu, SIK siusinnerusukkut Kalaallit Nunaanni Namminersorlutik Oqartussanut attaveqarsimavoq.

Aatsitassarsiorfinni isumannaallisaaneq peqqissuserlu pillugit ILO-p isumaqatigiissutaanut nr. 176-imut Kalaallit Nunaanni Namminersorlutik Oqartussat ilaatinneqarnissamik kissaateqarnerannik Inatsisartut aalajangiissasut Naalakkersuisut maanna inassuteqaatigaat.